





任縣志卷之六

列女

明

楊氏韓森妻森故楊撫子驛成立娶霍氏生子棟甫而驛  
又故霍相與堅守知縣韓濂以雙節旌之

郝氏李節妻年十九節卒生遺腹子用郝撫之成立爲諸生未  
幾用又卒止遺一女孫紡績自給

夏氏謝天祿妻年二十七天祿卒遺一子朝用甫二歲夏上事  
舅姑下撫幼子艱苦萬狀守節五十餘年壽八十有二知縣旌  
以慈子朝用判德州孫四人曾孫數十人皆貴顯人謂貞節之

報云

馮氏庠生李玟妻每勸夫以勤學上繼繡衣公之志玟果有聲於時年二十六而玟卒止遺一弱女馮親織紉以養姑後嗣孫數人果榮顯

劉氏生員李縉妻年二十二縉亡一子甫二歲姑年七十餘劉事姑撫幼委曲備至子希孔成立復卒遺孫二劉撫教之一孫桂芬爲諸生

李氏程士聰妻年二十二而寡家甚貧紡績度日子紹宗孫箴俱成立爲諸生

謝氏朝用女年十六歸庠生王朝立三年而朝立卒一子始及

週謝撫之堅節不逾壽五十餘

袁氏張大用妻年二十三夫卒大用弟利其產欲奪袁志袁堅守不渝壽七十五知縣孫榮先賢而旌之

吳氏李如槐妻年二十五而孀遺二孤俱幼吳秉節撫孤俱成立一子傳芳補諸生知縣吳應隆檄免侍丁一人

孫氏霍強妻強卒遺一孤生甫三日時孫年二十五守節四十餘年撫子盈科成立知縣吳應隆憐其苦節復其徭役

秦氏張文表妻年二十六夫故子從敬甫五歲秦撫孤守節壽六十餘

駱氏馮高妻年十八高卒遺一子甫一週駱撫孤守節四十七

年子巨卿爲諸生

栗氏張文相妻年二十二文相卒遺雙生二孤族人欲奪其志栗抱孤泣曰我爲死者撫孤忍此孤無所歸殆無人心者矣自是人不敢言壽七十餘

張氏杜宗魁妻生一子甫三歲宗魁卒父母憐其少微諷之張泣且誓曰命之不淑中道失天熒熒弱息不絕如綫如有二心犬豕不食吾餘乃屏去華飾非大故不出閨闕苦節六十餘年壽逾八旬

李氏吉尙萬妻嫁七月尙萬卒李欲殉姑勸之曰念有妊吉氏不可無嗣李感悟而止踰四月生一子名佐李撫之守節四十

餘年子成立知縣吳應隆復其徭役

李氏韓廷憲妻生一子而廷憲卒年方十九艱苦備嘗並日而食數十年壽七十餘

王氏韓世英妻世英早卒王時年十九堅守苦節四十餘年撫子成立

秦氏舉人霍玉妻玉卒秦年方十九生一子未週秦撫之比成立娶妻生一孫而子復卒秦又撫之壽七十餘

李氏年十七適郭文政三載而文政卒遺一子永實甫三月李號泣欲自縊家人覺之互相防守勸之曰汝殉夫死於義得矣倘兒失恃文政祀不斬乎李感悟而止勤紡績以奉姑輟口腹

以教子壽七十七而終子爲諸生

趙氏陳景臯妻住縣南甘泉寨正德間遇流寇被掠趙義不受辱投井中賊避井旁驅鄉民救之比出見賊復投井賊怒下石斃之知縣陳璣旌以詩

孟氏年十六爲張伯學妻家甚貧甫十月而伯學卒越三日生一子舅姑以家貧且憐其少欲嫁之已受張氏聘孟抱孤號泣避居母家七年孤八歲始歸壽六十八子得成立伯學祀賴以不絕

吳氏李如林妻年十九而夫亡遺一子新芳尙未週吳撫之飲冰茹蘖四十一年人無間言壽六十餘



王氏年十七適馬之驥甫六載而夫卒遺二孤俱幼家貧荼苦萬狀霜節不渝二孤既長家亦漸裕一子文秀爲諸生駱氏生員霍可久妻年二十可久亡惟遺一幼女駱求死以殉不飲食者數日母袁氏亦孀居苦勸得不死以貞自誓葬夫於臥側與瑩爲侶者二十餘年

趙氏都憲孔昭女適太學生杜偉偉二十有一得痼疾不可治將革趙先自縊於暗室欲使偉不慮其後也婢覺救之既甦深咎救者無何偉絕趙求死益堅舅姑素憐其孝益人守之趙泣謝遂不食而死奉 旨建坊

常氏監察御史趙公文炳妾真定小姓家女也博學善屬文性

尚儉素甘澹泊事含章時獻箴規不作媵媚狀萬歷壬午含章病篤氏焚香告天願以身代含章憐其幼勸事後人氏不應迺以溫嶠絕裾謝其母置毒自斃人解以水輒碎其器自謂吾食砂糖死之夜含章痾疾時瘳如掃其至誠格天如此所遺翁姑及含章二書辭氣壯激凜凜猶有生氣縣令爲立石以旌其墓陳氏霍原妻年三十未有子陳以原早孤恐嗣息遲爲納妾王氏逮以恩禮連得三子孝廉玉其長子也陳撫之如己出比玉成立尚不知爲王所生鄉里皆賢之

李氏毛鉉妻鉉卒遺庶子洵方數歲李視如己出不分嫡庶曲盡撫養既長教以義方捐金以拜官待洵生母劉氏如鉉在日

與之相終始云

謝氏諸生宋普繼室也生子國光未三月而普卒謝時年二十有三欲以身殉念撫孤爲重遂堅忍守貞擇師教子迨國光游上庠謝始易簪

劉氏生員應徵女許字生員李廷高子日茂未嫁而日茂病故劉時年十七往視殮成服痛哭幾絕取服飾盡焚之母知其有死心令媒媪動以豪門劉持刀逐之乃謝母曰善撫二弟兒不孝不能侍左右矣自縊而死士人爭爲詩文挽之萬歷間奉旨令合葬建坊旌之仍立祠歲時致祭焉

張氏州司馬維藩女適生員謝晉秉性貞淑二十二而寡子女

皆無以節自勵孝於舅姑和於妯娌直指使者屢旌之今壽七十有九

國朝

霍氏生員苗滋妻年二十有二滋病故無子僅遺一女霍欲身殉家人覺而救之得不死霍念夫不可無嗣乃立子以繼宗祧舅姑有疾湯藥必嘗以進撫幼叔如子皆成立遇歲饑人相食或有諷之改操以圖存者霍絕食幾死終無二志康熙六年奉旨建坊旌之

吳氏生員純粹女年十七適謝欽三載欽病故遺一子之甯方二歲父母舅姑憐其少咸欲嫁之吳截髮指天自誓不他適遇

歲饑人相食吳半菽不飽志益堅上事舅姑下撫幼子備茹荼苦未嘗愠形於色教子之甯早歲成名康熙六年奉 旨旌以霜節承恩

毛氏鄉民霍爾秀妻年二十九而秀卒遺二子歲大饑死者相繼父母及姑皆迫令改嫁誓死弗從慮二子不能並存鬻其一以養姑留其一以奉祀今壽七十有五

劉氏生員張振聲妻振聲早卒劉年二十有九遺子四方四維皆在襁褓中遇歲饑劉仰事俯育皆取給於織紉擇師教子皆成名今年六十有九

馮氏生員孫錫妻崇禎間遭兵變錫以二子囑馮氏曰我爲朝

廷士子有死而已汝力保之以綿宗祀馮乃剔目剪髮作乞者狀自全撫孤將地畝分給族人之貧乏者留百畝以教子年五十有九卒子觀光爲諸生

杜氏民人董秀妻生子胤昌未期而秀故杜時年二十有二家貧子幼萬無全理父母舅姑交勸之改節杜斷二指自矢今壽六十有二撫子若孫皆成立

蘇氏民人孟粹妻三十一歲而粹卒子女俱無姑與母皆勸之改字蘇對曰夫婦情重不問子之有無也艱苦備嘗節操愈勵教姪振世讀書爲諸生尤人所難今壽六十有九

韓氏民人張文燦妻相夫以孝敬稱崇禎十七年其夫爲流寇

所殺韓念撫孤爲重欲棄家去鄉鄰阻之弗從乘夜埋夫挈子  
士琪匿中原山及寇退旋里比鄰死鋒刃者甚衆貲財俱蕩然  
矣人皆服其有識今壽七十有四備嘗艱苦子孫蕃衍使非韓  
先見則文燦不祀矣

王氏生員劉翼聖妻年二十五翼聖見背遺子鏗甫六齡家徒  
四壁時或甑塵王上事羣姑下訓幼子皆出自紡績比子成立  
教以義方不少假借儼若嚴父今鏗爲諸生

呂氏生員程錄妻年二十五錄亡無子舅姑皆勸之改節呂誓  
死不從撫姪憲教之成名爲諸生

孟氏民人杜江妻早亡遺四子孟矢節撫之無何夫弟杜水又

故妻改適遺子望在襁褓中子然無依孟不忍水絕祀子姪不能俱存乃鬻二子而撫之上憲旌其貞淑

張氏姜雲龍妻善事舅姑戚族以賢稱年二十雲龍卒無子女堅志自矢撫幼姪為己子備歷艱苦未嘗有難色姪士英生孫成立壽五十二而終知縣張有光旌之曰芳傳柏節以上俱係舊志

鄭氏監生苗時保妻年二十三守節四十餘年旌表

霍氏生員宋敞妻年二十六而寡事舅姑有禮教孫文林遊庠

食儼守節四十餘年旌表

孫氏張良知妻守節旌表

孟氏李準銘妻年十九守節旌表



張氏王寬妻年二十守節旌表

葛氏郭有德妻年二十六守節旌表

劉氏生員孟坤妻年二十六守節旌表

霍氏孫雲泰妻年二十五守節三十八年旌表

李氏張兆田妻年二十七守節旌表

王氏孟貞惠妻年二十二守節旌表

陳氏奉祀生孔衍祉妻年二十守節四十餘年旌表

楊氏生員王肫妻年二十守節四十一年旌表

吉氏霍配妻年二十八守節四十餘年旌表

盧氏生員檀兆祥妻年二十五守節五十一年旌表

孫氏曹復新妻年十八守節旌表

賈氏廩生王國模妻二十一守節知縣畢曰零詳請旌表

李氏生員王國楫妻年二十五守節三十六年旌表

屈氏陳明遠妻年二十三守節旌表

賀氏侯喜聚妻年二十三守節旌表

張氏陳聯魁妻年二十三守節學院吳題請旌表

穆氏生員王修德妻年二十四歲守節乾隆五年建坊旌表

馬氏孟洪範妻年二十一守節乾隆十年建坊旌表曾孫婦曲

氏年二十三守節與氏後先輝映云

趙氏謝勤妻年十八守節乾隆十五年詳請旌表

孫氏生員張榮先妻年二十五守節乾隆二十年建坊旌表

王氏庠生孫貴妻年二十六守節乾隆二十年建坊旌表

張氏左良能妻乾隆二十四年旌表

梁氏司元愷妻乾隆二十五年旌表

賈氏孫洪妻乾隆三十年旌表

梁氏葛振先妻乾隆三十六年旌表

司氏王如經妻年二十七守節乾隆三十六年旌表

鐔氏王子恭妻乾隆三十九年旌表

李氏霍繼光妻乾隆四十三年旌表

賈氏馬克恭妻二十一歲守節乾隆年旌表

楊氏庠生趙燦然妻夫早故氏撫子長壽守節一日自中魁村  
赴天口適大霧路遇盜耿喜欲犯之楊不從竟爲耿喜所殺邑  
候倪公上其事嘉慶元年旌表

謝氏生員李紹曾妻奉舅姑和妯娌一家無間言及夫亡遺一  
子亦亡氏矢死靡他戚里聞諸官建坊旌表

呂氏張茲年妻二十五歲而寡姑老子幼饗殮難繼氏晝夜織  
紡甘旨奉姑勤儉教子苦節凡五十餘年其次子爲諸生

苗氏王廷桂妻年二十九守節

王氏增生王九鼎妻二十歲而夫卒子女皆無親操井臼上事  
翁姑下撫幼叔後叔娶妻生子養爲己子守節五十餘年

蘇氏李金堂妻二十三歲守節身勤織紡孝事舅姑立嗣以存夫祀

王氏孫修德妻年二十四守節

董氏孟珣妻年二十四而珣卒子永恭甫三歲又生遺腹子永寬氏孤立無助族人利其產業者卽分給之弗校也教子孫讀書子永恭及孫四人俱庠生孫婦于氏年二十四而寡曾孫婦劉氏亦少寡俱以節操稱

邱氏王國幹妻年二十一夫卒子文魁甫三歲姑及本生姑並媼居年且老氏綜理家務事兩姑皆能盡禮教子讀書後爲國學生

樂氏劉登貴妻年二十七登貴卒子懷敬方六歲氏上事孀姑下撫孤子艱苦萬狀姑病且卒侍湯藥營喪葬無不如禮

趙氏孔傳誥妻年二十二夫卒子繼廉生三歲翁姑俱年邁孝事二十餘年子亦成立

劉氏庠生張大綱妻年二十二守節恪守閨訓始終如一

劉氏武生倪文升妻年二十三夫故無子次姪信入繼氏持家勤儉訓課子孫壽七十餘孫克勤中己酉副榜

安氏賈射妻年二十三守節

郭氏魏學文妻年二十五守節

白氏拔貢韓建業繼室年二十七適韓三十守節

苗氏魏鍾靈妻年二十四而寡無子矢志靡他操井臼奉姑嫜久而彌篤撫姪廷蘭爲嗣嚴慈並用以至成立嘉慶八年建坊旌表

霍氏鄧思聰妻年二十六守節

韓氏李庫妻年三十夫故舅姑年老有二子一女氏孝親有道教子有方二子皆入泮其子婦劉氏年二十八夫亡遵守姑訓孝慈兼盡其子亦遊泮

楊氏王勳妻年二十二守節

鮑氏周啟家妻年二十一守節

郭氏鄭廷珍妻年二十四守節

陳氏馬修德妻年十九夫故志欲殉姑苦勸乃止後姑得噎隔疾親侍湯藥晝夜不眠常祈禱願以身代以無子養兄子爲嗣教養兼盡苦節凡三十九年

孫氏陳愷妻年三十夫卒三子俱幼家貧無依氏養親教子織以代耕二親皆壽近八旬三子亦各成立

宋氏劉得雨妻年二十七守節

王氏劉士連妻年二十九夫亡遺一孤在襁褓翁姑衰老氏親把鋤犂以給奉養乾隆五十八年村火燒延多家親柩在堂氏身率子孫舍身救護始獲無恙苦節幾六十年

張氏郭沂妻年二十六守節



韓氏陳傑妻年二十九守節

李氏牛興祿妻年二十九守節

馬氏苗喜會妻年二十七夫卒以叔子元豐爲己子旣而其叔亦亡與弟婦王氏雙節並勵

趙氏馬得水妻年二十九夫卒遺二孤長三歲次而月妾周氏年二十六亦遺子方數月同心守節

王氏朱成章妻年三十夫卒一子方六歲孤貧無依氏日夜紡績遇饑歲并日而食守節愈嚴

高氏刁名魁妻年三十守節

李氏庠生王愉妻年二十六夫卒遺一子甫三歲氏撫育之至

弱冠既娶而亡婦張氏亦能守節與姑相終

劉氏牛紹鳳妻年二十六夫卒子甫七歲家貧苦節自守紡績養親翁得瘋症不省人事氏不辭穢臭以奉之

孟氏劉文通妻年十八守節

徐氏劉成業妻年十七守節

王氏李善士妻年二十二夫卒遺子僅十月有嫂姜氏孀居無子同心守節孝養翁姑

宋氏霍光顯妻乾隆五十五年督學倪賜匾節操清芬

宋氏吳崑之祖母嘉慶二十二年督學杜賜匾砥節衍宗

王氏姜據德妻年二十九而寡撫孤守貧織紡度日常曰貧何

足病婦德有玷實可醜耳

劉氏牛學知妻年三十守節乾隆四年督學錢陳羣旌以柏節松心

馬氏葛漣繼妻年二十七守節

顏氏駱文秀妻年二十守節

張氏穆連妻年二十餘守節

鄭氏監生張文才妻年三十夫亡遺一女無子氏幾欲身殉既而念宗祀爲重姑老無託苦志守節以姪金生爲嗣

苗氏宋法孔妻年十七守節五十餘年

趙氏宋自修妻年二十三守節五十餘年

宋氏馮居瀛妻年二十三守節

王氏生員宋向榮妻年二十二守節

陳氏于盟莊達璟妻年二十八而寡子太和妻賈氏年二十九而寡姑媳雙節先後相映

孫氏張中倫妻年二十五守節無子紡績度日守節五十餘年  
王氏郭祥起妻年二十九守節四十餘年

王氏檀偲妻年二十九夫亡遺二子俱幼氏矢志守節孝事翁姑撫養幼子成名守節三十餘年

楊氏蕭麟鳳妻年二十四守節無子氏勤於織紡孝事翁姑後繼姪孫爲嗣

徐氏廩生劉懷琛之曾祖母年二十三守節六十餘載

魏氏周興學妻年二十九守節惟遺一女翁姑年老無依氏孤身獨立節孝克全

吳氏李德明妻年二十一夫卒無子孝事翁姑尋以紡紝積財爲翁納妾後舉一子李氏祀賴以不絕

孔氏孟珽妻年二十七守節三十餘年

吳氏劉登岐妻年二十八守節三十餘年

蘇氏賈士臣妻年二十五守節

劉氏苗廷對妻年二十七守節

姜氏李學仕妻年二十三守節

吳氏劉廣運妻年二十九夫卒遺子七歲家貧親老氏砥節自  
矢奉養無缺秋水漲溢姑墮水氏投水救姑始得無恙子亦成  
立

黃氏葛自會妻年二十四守節

韓氏葛嗣昌妻年十八守節

姜氏生員宋用中妻年十八于歸卽值夫病氏躬侍湯藥晝夜  
不眠者三載至二十一歲夫入泮旋卒氏矢志殉夫翁姑勸乃  
止後翁姑皆歿以姪承嗣無何姪又亡以姪孫爲嗣孫

張氏孟性善妻年二十九守節

宋氏劉好善妻生員學禮之女年二十而寡子方二歲恐不成

立因勸翁納妾復生一子未三載庶姑與姑俱歿教子入泮翁卒後其子與媳相繼而亡撫孫與庶弟同受教養

賀氏駱元德妻年二十一守節

張氏徐士敏妻年二十四守節

趙氏孫丕泉繼妻年三十四而寡遺子方彌月氏撫孤守志有垂涎氏之田產者使賊乘夜持利刃殺孤氏抱孤懷中與賊格鬪幸賊失刃逃亡母子得免身不出戶庭者四十六年教子若孫皆成立長孫武生次孫庠生

劉氏王開河妻年二十一而夫亡遺一子翁姑殘病家貧氏晝則拾柴夜則紡棉孝事翁姑慈育幼子三十餘年

馬氏李仁妻年二十八守節

王氏李繼妻年二十九夫亡家貧翁姑子女皆無孀母失明氏奉之維謹苦守終身

鄧氏周懷珍妻年二十八守節三十餘年

許氏周懷玉妻年二十六守節

以上續志

朱氏新市村庠生曲雲祥妻生三女二男雲祥以勞瘵病故氏時年三十四所生女三人齒未齟長子錫肇甫三歲次錫田未週齡氏有孀姑年老病痿痺不能起床家產陵替無伯叔兄弟宗親可依姑又久病諸子女號寒啼飢無寧日一時鄰舍里黨無不代爲氏難而氏奉姑孝謹撫遺孤體恤周至親操井臼勤



績紡經營家務井井有條如是者有年姑甘旨不缺於供諸子女亦稍長女課婦功男延名師適歲屢豐氏善持籌家計因以充裕又數年姑以壽終女嫁男婚長子錫盤復入泮次錫田亦應童子試氏至是亦年逾花甲矣辛苦半生精力亦衰因得風症於嘉慶十八年卒年六十七統計守節之日養姑教子蓋三十二年云

劉氏楊士豪妻夫亡遺一女方四歲氏砥節自矢踰年士豪之弟及弟婦皆亡又一年姑亦亡氏號泣欲絕既而思有翁在猶可爲門祚計乃勸翁復娶趙氏越一年生子士魁又十年翁始卒氏與繼姑同心教養士魁幸得成立有子四氏以其長爲己

嗣而以其次嗣弟後楊氏之不絕皆劉之力也嘉慶年旌  
宋氏杜某妻未嫁而夫亡女家議赴弔女知之請偕往父母不  
允女曰父母之赴弔非因女之許字杜氏乎奈何不令女一往  
弔也既送葬謂翁姑曰二親已老子在可供養今子沒復誰賴  
願留此以終身遂不去

霍氏宋敞妻年及笄未歸而敞疾篤氏欲往視疾親屬咸阻之  
氏曰已受聘即誓以終身設彼不起義亦不可背也敞卒氏殉  
之奉 旨建坊 此條與前宋霍氏名姓皆同而事則異或傳之者有誤歟

趙氏檀時中妻二十八歲夫卒遺子二氏朝夕訓以義方後皆  
成名道光三十年旌

丁氏顏宏道妻夫沒時遺田二十餘畝而夫弟六人氏謂諸弟曰田地少各立門戶皆不足以自存同心志共營生理家計尙可爲也諸弟唯唯於是量其才能使各執一業諸弟婦事紡績日有程氏儼爲之家督積四十餘年資產贏前二十餘倍乃延師課諸孫讀居然一鄉巨族焉

論曰鄉里貧賤之家婦女勤勞往往過於男子且或能主持家政轉貧爲富而今之談計學者動謂吾國婦女皆分利之人彼自見其家人列屋閒居遂意天下之皆然如顏丁氏者則又何說焉

馬氏張五德妻年十九歸五德祖姑年老舅姑皆多病未幾舅

卒姑患癱疾氏日夜侍養凡四年而姑卒敝屋數椽已出售買者重氏孝仍聽故居咸豐三年八月粵匪陷城五德遇害氏時年二十五聞變痛欲殉思祖姑尙在婦死祖姑卽不能一日生且有遺腹冀生男以延張氏祀數月生一子紡績供養育祖姑沒餘田二畝盡售以爲殮葬資買土屋二椽奉木主生計益無聊賴因寄母家爲兄嫂執女工每逢令節攜兒回故居設木主涕泣奠拜如是者二十餘年兒稍成立家計亦稍裕年八十餘卒

論曰當五德之死也設婦以身殉誰謂非完節者乃上念無可託之重慈下冀未可知之遺嗣焦思苦身卒能使無養者

有養無後者有後婦人承夫之義蓋必如是而後無憾焉視  
激於一時之痛一瞑不視者其艱難殆百倍歟

陳氏曹志遠妻年十五于歸二十二歲夫亡依翁姑以居咸豐  
八年捻匪突至氏設法藏匿翁姑賊搜得翁欲殺之氏匍匐號  
救情詞悲切賊爲之動容翁得無恙

段氏董九章妻同治二年捻匪擾境氏年二十一爲賊騎追逐  
自度不得脫適道旁有井急投之而死

劉氏郭鳳翔子婦同治二年馬賊闖入其家氏恐被脅投井死  
顏氏吳鳴臯妻貢生承晉之祖母

張氏王重和妻同治七年正月賊突至欲逃無所因閉門坐暗

室藏廚刀賊闖入逼氏與理髮氏僞應之握其髮努力以刀斫之賊痛號倒地他賊聞而往救掣佩刀斫氏落一手復連斫數刀賊乃去氏死而復蘇聞其事於官祀節孝祠

論曰段氏劉氏甯死不辱大節凜然善矣陳氏出至誠以感豺狼豺狼亦爲之格卒能免親於難尤善之善者也獨張氏者豈不知賊至之必辱不辱之必死乃懷一必死之志潔身而死尤欲殺賊而死其膽略均有過人者嗚呼方賊之橫行河朔如入無人之境豈復料閨閣中大有人在不知當時之號稱將帥者建高牙擁大纛握衆兵對賊乃不發一矢聞張氏之風亦曾愧死否也

屈氏蘇鳳宜妻守節同治三年旌

溫氏楊錫禎妻年十七守節同治十年旌

耿氏李士傑妻守節同治八年旌

孫氏崔文俊妻年二十八守節

曹梁氏年二十一而寡惟姑與夫弟姑年老弟方五歲室無升斗儲氏以紡績供姑弟食己嘗不一飽艱苦萬狀而矢志靡他

苗氏王繼昌妻年二十一守節

張氏王振紀妻年二十一守節

曲氏杜煒妻年二十七守節

李氏曹進賢妻年二十五守節

龐氏馮人龍妻年二十守節

郭氏牛山妻十九歲守節

彭氏謝復義妻年及笄歸于謝逾年而夫卒生一子甫數月翁姑隱以爲憂盡心定省較夫在之日有加子麟書未弱冠入邑庠逾二年復卒氏曰翁姑尙在堂移慈子之心以事親爲謝門之順婦可也同治十年知縣徐廷幹爲詳請旌表

馬氏趙德隆妻二十六歲守節同治十三年旌光緒四年建坊  
宋氏房某妻守節同治年旌

賈氏張英豪妻二十八歲守節

高氏孫振明妻二十六歲守節



劉氏孟鳳麟妻二十三歲守節

劉氏李爲濟繼妻年二十八而寡翁姑皆患癱氏奉養扶持十餘年如一日及沒喪葬盡禮撫子成立教以義方同治八年旌

胡氏劉某妻十九歲守節同治年旌

馬氏鄭欲忠妻年二十餘夫故遺腹生子家貧親老氏晝夜織紡以事以育同治年旌

郭氏宋及祖妻守節光緒六年旌

曹氏孟守忠妻十七歸守忠未幾夫卒守節光緒年旌

高氏宋觀海妻年二十九而寡躬事寡姑撫子芸閣令就學姑沒後伯嫂主家政性苛細家固殷富而待氏甚菲氏受之無怨

色敝衣疏食日事紡績錦繡甘旨悉讓長房集蓼茹苦媿媿如也子弱冠舉茂才孫清吉亦入泮子孫繩繩娛侍老境年七十餘卒

王氏穆占鰲妻氏母家故望族按察張凱元其外祖也幼依外祖讀書每聞節烈事輒心慕之及笄歸穆孝敬婉順婦道無違年二十一夫故遺一子九河尚幼一女僅周歲家道已中落旁無依恃氏身節儉治家有法度節日用餘積贖還先世已質田舅姑沒葬以禮一日謂其子九河曰吾年已邁未得抱孫豈爾陰隲有虧乎爾布衣居鄉里有何利濟事能作曷習藝量力施藥餌亦利濟之一端也晚得孫稍長口授書以教之年七十卒

張氏在城周純儒妻武生有祿之母十八歲守節光緒八年旌  
賈氏任大田妻年及笄歸任逾四年生子甫十月而夫卒有夫  
弟繼母出也以氏年少子幼憇之冀其他適母家亦或以微詞  
諷之謂姑不慈不易奉事弟非夫同母終日介介殊難得調又  
此呱呱者將可必其成立乎氏曰夫雖亡孤自在設孤復不存  
有死而已吾志已決勿復有云矢節撫孤虔盡婦職久之姑與  
弟亦爲之感動氏年九十餘孫曾繞膝人皆以爲苦節之報焉  
馮氏王文炳妻年二十五夫卒夫弟文蔚旋亦卒氏與弟妻宋  
氏同心守節光緒年旌  
趙氏文學賢妻年二十五守節

孔氏趙占金妻年二十守節光緒十四年旌

王氏吳廣業妻年二十三守節

謝氏張光甲妻年二十五守節

趙氏曹德明妻年二十九守節光緒年旌

楊氏鄧橋村高東峯妻二十一歲守節事翁姑以孝聞一子甫三歲撫之成立家故小康咸豐三年歲饑出粟賑鄉里至今村人猶念楊氏之德光緒年旌

姜氏張永順妻二十歲守節

許氏楊大田妻二十七歲守節

王氏丁之仁妻年二十守節

馮氏趙九寬妻年三十三守節光緒二十三年旌二十五年建坊

張氏生員景顏女幼字姜德潤之子舉渭未婚而舉渭卒氏時年十六聞喪往弔拜謁孀姑遂不返虔盡婦職得堂上歡立嗣以奉夫祀守節待旌

論曰古有天柱地維之說天有柱孰扶之地有維孰繫之蓋人得天地之正氣以生惟直養無害者發而爲忠孝節義有以彌綸充塞於兩間是卽所以扶天柱而繫地維也夫忠孝節義其責備當在士大夫自世道日衰欲於士大夫中求一名教完人往往間世而不一遇獨節之見於婦人女子者乃

隨時隨地而常新豈婦人女子其知明守定轉優於士大夫哉余嘗思其故矣生人之節概成於學問者多游移激於性天者多果決讀書窮理素爲忠孝節義之談及身履其途禍患在前顯榮在後大利大害只爭頃刻之間稍事參詳覺更有一理以自解不曰因事以行權卽曰留身以有待辱人賤行之事遂甘蹈而不辭此無他外緣之可歆羨者既多而平時所學問又足援引以文其懦也若婦人女子則地處幽閑志惟專一既無顯名厚實之縈其念又無支辭飾說之亂其心而從一以終又生而習聞習見以爲事之當然理之固然不待講求早知其無容遷就故清風勁操不特見於富貴之

族詩禮之家卽生長窮簷不識詩書爲何物一旦遭逢不幸亦多能含辛茹苦不負所天所以然者彼旣無士大夫之所歆羨而又未聞有他說焉可藉圖便利於一身乃能矢志靡他如此也今習尙維新憫婦女之柔暗思立學以開之然婦職詳於內則女誠著自班昭吾國婦女何嘗無學而論者謂是仍扶陽抑陰之舊說不足以開知慧也必當教以女學之新者則男女欲其平權夫壻由於自擇使是說而存於婦人女子之心女學之發達尙未可知其以擾貞靜之守有餘矣夫忠孝節義旣不概見於士大夫而節之獨留於婦人女子者又欲取而滅裂之柱折維絕其不遠哉

增補

人物

宦蹟

鄉耆

列女

宦蹟

張書紳字銘心鄭家莊人貢生歷署肅寧縣晉州磁州等處訓導又署正定府教授在任內並代理同知月餘時滹沱河腳船需索太甚與渡客每起衝突書紳查悉此弊酌定官價船戶行人遂各得其便云

鄉耆

劉棟字美材環水村人邑諸生輕財好義孝友性成出繼大父遺產歸弟楫楫家中落早卒遺一子亦早卒孫尙幼度日維



艱棟撫姪媳及姪孫體恤周至給負郭葦田十三畝良田十二畝壽七十餘卒其子振邦補弟子員孫永錫中道光乙未鄉科曾孫書旂中光緒丁酉鄉科其他科名累世不斷遂爲世家

劉致祥字和甫環水村人貢生性聰明渾厚善詩文歲科試輒魁其曹居鄉有厚德人皆悅服事無大小裁決悉當有爭訟者一至其前卽各愧悔其感人之深如此人稱之爲聖賢年八十餘卒

### 列女

張氏年十九適環水村武生吳安邦生一子昭甫二載而安邦

卒其前妻遺三男四女張撫育恩勤不分畛域四十餘年人無間言男二爲諸生一爲武德騎尉其後曾孫數十科名累世皆張詒謀之善也壽七十六卒同治十三年知縣胡承頤聞於上憲賢而旌之題其額曰節賢孝慈紀其實也

李氏南留寨奉莪之妻舉人李紹絳之女也于歸後以賢孝聞於鄉里年二十六奉莪卒遺一子期年而亡家貧甚李紡績度日上事翁姑甘旨無缺而自奉甚儉繼一姪中年而歿又鞠育姪孫成立今年近古稀猶操作不懈云